

Swisscom: La digitalisaziun munta ina gronda sfida

Radunanza dals acziunaris a Turitg

DA LUCAS DEPLAZES / ANR

■ **La radunanza dals acziunaris ha approvà il rapport annual da Swisscom e concedì ina dividenda da 22 francs per accia. L'onn 2014 ha Swisscom fatg in gudogn da 2,4 milliardas francs.** Senza telecomunicaziun digitala na va oz nagut pli. Ils programs da radio e da televisiun vegnan emess pli e pli en furma digitala. Nus pajain la pli gronda part dals quints cun formulars digitalisads. Passa 80% dals pajaments e dals transferiments finanziaus succedan en furma digitalisada. Proximamain pudain nus er pajar en las stizuns cun «munaida» digitalisada e laschar las bancnotas a chasa. Il daner blut perda adina dapli sia muntada sco med da pajament.

Redublà la capacitat

Tar quest svilup surpiglian las interpresas da telecomunicaziun ina rolla centrala. Swisscom ha redublà l'onn passà sia capacitat da transmissiun, ha constatà *Hansueli Loosli*, il president dal cussegl d'administraziun, a chaschun da la radunanza dals acziunaris a Turitg. Il mund digital cumpiglia tut ils secturs e pretenda ina amplificaziun e modernisaziun permanenta da la rait da telecomunicaziun. Dumandada è la colliaziun online da tuts ils apparats, da tut temp e daper-tut. Swisscom investescha en Svizra onn per onn var 1,7 milliardas francs per pudair satisfar als basegns dals clients. Quest trend maina a novas fieras. Cun

metter a disposiziun la meglra rait da telecommunicaziun sustegna Swisscom er la cumpetitivitad da l'economia svizra, ha punctuà Loosli. Fin l'onn 2020 duain 99% da la populaziun pudair disponer da la rait a spectrum lartg. Grazia a quest svilup possian profiar var 100 000 plazz da lavur en las diversas spartas da noss'economia. Actualmain dispona

Swisscom da 21 125 plazz da lavur a temp cumplain. L'onn passà ha Swisscom creà ulteriurs 1017 plazz da lavur, 910 en Svizra.

Augmentà la svieuta

L'onn 2014 è s'augmentada la svieuta da Swisscom per 2,4% sin 11,7 milliardas francs. *Urs Schaeppi*, il CEO, ha accen-

tuà la ferma concorrenza internaziunala sin il martgà da telecomunicaziun. Quella situaziun maina ad ina erosiun dals pretschs. L'onn passà ha Swisscom stuì cumpensar 360 milliuns francs, quai che saja stà pussaivel grazia a novas prestaziuns. Swisscom introducescha onn per onn novas prestaziuns ed augmenta sias activitads cun acquistar novs secturs

administrativs sco per exempel la compra da «local.ch» u prestaziuns sin il sectur da la sanadad. Swisscom metta gronda paisa sin in bun servetsch a la clientella. Il temp da spetga per infurmaziuns sut il numer da telefon 0800 800 800 duai vegnir reduci sin damain ch'ina minuta. Davart la critica da las tariffas da roaming ha Schaeppi pudì quietar ils spierts. En l'avignir vegnan quellas tariffas cun nattel infinity quasi a svnair.

Buna rendita da las aczias

L'ultim temp è s'augmentà il curs da las aczias da Swisscom per 9,5% sin actualmain 560 francs per accia. Quai lubescha da distribuir als acziunaris ina dividenda da 22 francs per accia. In tras l'auter portan las aczias da Swisscom ina rendita da 4% l'onn. Tenor la constituziun (art. 92) èn ils fatgs da posta e telecomunicaziun chausa da la confederaziun. Ort quest motiv sto la confederaziun disponer dad almain la mesadad da las aczias, quai che porta ina rendita da passa ina mesa milliarda francs.

Indemisaziun transparenta

Ils 1757 acziunaris preschents han er approvà las propostas per l'indemisaziun dals commembers da gestiun dal concern e concedì in credit da rama per l'onn 2016 da 9,7 milliuns francs. Il president, *Hansueli Loosli*, ha retratg l'onn 2014 ina indemnisaziun da 591 000 francs. *Urs Schaeppi*, il schef operativ dal concern, 1,7 milliuns francs.



La Swisscom ha fatg l'onn passà in gudogn da 2,4 milliardas francs.

KEYSTONE